



*Selasa, 06 Maret 2024*  
**Ogen: Nahum 3:5-7**



**Enggo Rontas**



**R**ontas, sada gambaren ceda la terpekena. Adi kin barang ndai arus ganti baru. Adi kin rumah ndai bangun ulang, lanai terrehap. Adi hubungan manusia ras manusia lanai lit si mehulina, sirang lanai terpekena. Bage me kecibal kalak Niniwe i bas ngaloken rawa Tuhan.

Tuhan jine si erbelas, 'o Niniwe, Kuukum kam, Kubahan maka kam manjang-anjang...' Tuhan nalangi kerina perbahanen kalak Niniwe si melket, si la meteh mela, si erlua-lua. Icidahken Tuhan kerina i lebe-lebe bangsa-bangsa. Kerina kalak meteh uga lagu langkahna si jahat e. Ngidah lagu langkahna e, lanai kalak merhat ngidahsa, ciga ate kalak, lanai ise pe nggit erteman rassa. Sebalikna, iisak-isakken kalak, ipudiken ras itadingken kalak. Nina bangsa-bangsa e, enggo rontas Niniwe, bangsa si itandai kalak kejam, erkuasa, rate-ate. Genduari lanai kai pe lit ergana. Erkiteken kekejamenna la lit kalak si rate mekuah man bana, la lit ise pe si ngapulisa, itadingken kalak i bas kiniseranna. Lanai ise pe lit si rutang pusuh guna nampati.

Erlajar arah perbahanen Tuhan si mbelin e nandangi kalak Niniwe, tangkas man banta maka mereken ukumen e otoritas Tuhan. Guna kedaulatenNa isehkenNa kai si enggo ibelaskenNa. Ise pe labo ngasup ngolangisa. Adi rimbangken Tuhan e, melala dalam si banci ibahanNa gelah kita sontar. Pusuh kerina jelma banci ikuasai Tuhan lako naluken kita. Adi tetap kita ertahan i bas kejahatanenta labo lit ampunen i bas Tuhan e nari. Si siksiki perukuren ras perbahanennta, lit denga nge si man pekenan lako ngikutken kata Tuhan e? Situhuna, Tuhan e belinen keleng ateNa asangken ukumen si isehkenNa. Si ikutkenlah kataNa!

*Lit denga si mehulina, adi ngikutken kata Tuhan.*